

KEPIMPINAN

Ciri-ciri Kualiti Kepimpinan Rasullullah S.A.W yang Harus Dicontohi



Nur Fadhlina Zainal Abedin

NABI Muhammad S.A.W adalah pemimpin unggul yang menubuhkan kerajaan Islam di Madinah. Penduduk Madinah yang terdiri daripada pelbagai agama yang sebelumnya telah lama berpecah belah telah berjaya disatukan. Di bawah kepimpinan baginda juga, beberapa misi peperangan besar telah dimenangi. Keberkesanan kepimpinan Rasulullah S.A.W mewujudkan ketaatan, kehormatan dan pengiktirafan terhadapnya, samada oleh umat Baginda maupun mereka yang bukan Islam.

Menurut Yasin, Ghani & Jalal, (2014), kualiti kepimpinan Rasulullah S.A.W terdiri daripada enam kriteria iaitu ketinggian akhlak, ketahanan dan kesabaran, kemampuan menguasai diri, keadilan dalam pemberian hak, keberanian dan kekentalan, dan persiapan kekuatan mental dan fizikal.

1. Ketinggian akhlak

Seorang pemimpin harus bersikap mulia supaya menjadi contoh teladan kepada pengikutnya. Nabi Muhammad S.A.W merupakan seorang yang berintegriti, bertoleransi dan berlemah lembut dalam tutur bicara dan perbuatannya. Baginda juga bersikap terbuka dan menyantuni buah fikiran

pengikut baginda melalui prinsip syura dalam membuat keputusan. Ketinggian akhlak Nabi Muhammad S.A.W selari dengan perintah Allah:

"Maka dengan sebab rahmat (yang melimpah-limpah) dari Allah (kepadamu wahai Muhammad), engkau telah bersikap lemah lembut kepada mereka (sahabat-sahabat dan pengikutmu), dan kalaulah engkau bersikap kasar lagi keras hati, tentulah mereka lari dari kelilingmu. Oleh itu maafkanlah mereka (mengenai kesalahan yang mereka lakukan terhadapmu), dan pohonkanlah keampunan bagi mereka, dan juga bermesyuaratlah dengan mereka dalam urusan (peperangan dan soal-soal keduniaan) itu. Kemudian apabila engkau telah berazam (sesudah bermesyuarat, untuk membuat sesuatu) maka bertawakallah kepada Allah, sesungguhnya Allah mengasihi orang-orang yang bertawakkal kepadaNya." - Surah Ali Imran, ayat 159.

2. Ketahanan dan kesabaran

Tanggungjawab yang digalas oleh seorang pemimpin adalah berat. Oleh itu pemimpin perlu mempunyai daya tahan dan kesabaran yang tinggi dalam memimpin organisasinya. Daya tahan yang kuat secara fizikal dan spiritual dapat dibina apabila ilmu pengetahuan dan penghayatan agama yang diperaktikkan. Nabi Muhammad diuji dengan pelbagai cabaran dalam mengukuhkan Islam di bumi Makkah dan Madinah. Berkat kesabaran baginda yang tinggi membuatkan hasil kejayaan apabila kerajaan Islam di bawah kepimpinan baginda disegani ramai.

3. Kemampuan menguasai diri

Setiap pemimpin mempunyai kekuasaan dalam organisasinya. Namun ia tidak seharusnya disalahguna dengan membezakan darjah dan meluaskan jurang antara pihak atasan dan bawahan kerana setiap pemimpin bakal dipersoal oleh Allah S.W.T tentang perilaku dan tanggungjawab mereka. Rasulullah S.A.W mempamerkan jiwa yang tenang dan kawalan emosi yang baik dalam apa jua bentuk situasi yang dihadapi. Baginda mengamalkan pemerintahan bermusyawarah berdemokrasi yang seterusnya diperaktikkan oleh para Khulafa al Rasyidin (Syam, 2015). Ini dapat menjauhkan amalan autokrasi dan kuku besi yang hanya berfokus kepada kekuasaan individu. Setiap pemimpin harus mampu mengawal diri sendiri daripada berkepentingan diri terlebih dahulu sebelum menguasai dan mengawal insan lain.

4. Keadilan dalam pemberian hak

Pemimpin yang adil adalah seseorang yang selalu mendengar dan melihat, mendatangkan kebijakan dan bermanfaat kepada orang lain. Contohnya dengan mendengar keluhan dan masalah yang dihadapi oleh orang bawahannya dan tidak menyulitkan mereka. Sekiranya tiada keadilan dalam kepimpinan seseorang pemimpin, kemakmuran organisasi akan berantakan dengan pelbagai krisis.

Rasulullah S.A.W adalah seorang pemimpin yang adil terutamanya dalam membahagikan hak-hak mengikut kemaslahatan ummah. Malah baginda juga adil dalam melaksanakan hukuman sehingga pernah menegaskan bahawa, sekiranya puteri baginda Fatimah R.A yang mencuri, maka tangannya akan tetap dipotong (Mu'ammar, 2019). Disebabkan itu, tiada rungutan dan bantahan daripada kaum muslimin dan bukan Islam terhadap kepimpinan Nabi Muhammad S.A.W, malah baginda dicintai dan disayangi rakyat.

5. Keberanian dan kekentalan

Pemimpin perlu cekal dan berani dalam menghadapi rintangan dan cabaran dalam menerajui sesebuah organisasi. Pemimpin yang bijaksana mampu memelihara persekitaran di bawah kawalannya yang aman dan kondusif. Nabi Muhammad S.A.W. dikenali sebagai seorang yang berani berterus terang dalam soal kebenaran. Sifat berani baginda juga jelas dalam mengetuai perang-perang Islam. Dalam artikel Yasin, Ghani & Jalal, (2014), Saidina Ali R.A. memuji Rasulullah:

“Sesungguhnya kamu telah melihatku pada Perang Badar. Kami berlindung dengan Rasulullah S.A.W, dan di antara kami, Bagindalah yang paling dekat dengan musuh. Dan pada hari itu Baginda adalah manusia yang paling kuat di antara orang-orang yang ada”.



6. Persiapan kekuatan mental dan fizikal

Kekuatan mental dan fizikal perlu dipupuk di kalangan pemimpin supaya tidak mudah tersungkur dengan cabaran-cabaran dalam kepimpinan termasuk tawaran-tawaran pangkat dan harta yang haram. Sikap al-Ghaflah iaitu kelalaian dan kelekaan perlu dijauhi dengan mempersiapkan diri secara fizikal dan mental. Allah berfirman:

“Wahai orang beriman, bersiap sedialah kamu, dan majulah (ke medan pertempuran) berkelompok-kelompok, atau majulah bersama” (al-Nisa, 2: 71)

Cabarannya dihadapi oleh Nabi Muhammad S.A.W cukup besar. Antaranya sewaktu Madinah yang dipimpin oleh Rasulullah diserang musyrikin Makkah. Serangan dapat ditangkis oleh umat Islam dan perjanjian telah dimeterai sebelum ia dicabuli kemudiannya. Akhirnya umat Islam mencapai kemenangan dengan penaklukan Kota Makkah. Dengan penaklukan itu, semua berhala dan patung-patung di sekeliling Kaabah dimusnahkan.

RUJUKAN:

- Yasin, R., Ghani, S. A., & Jalal, B. (2014). The Application of Prophet's Qualities of Leadership in Shaping Preacher's Identity of Today. *QURANICA-International Journal of Quranic Research*, 6(2), 69-82.
- Mu'ammam, A. (2019). Kualifikasi Pemimpin Dalam Tafsir Al-Azhar. *Journal of Islamic and Law Studies*, 3(2).
- Syam, M. B. (2015). Kebijakan dan Prinsip Prinsip Kenegaraan Nabi Muhammad S.A.W di Madinah (622-632M). Tinjauan Perspektif Pemikiran Politik Islam. *Perennial*, 157-174.

Nabi Muhammad S.A. W. merupakan role-model kepimpinan berkualiti yang terbaik sepanjang zaman. Ciri-ciri kualiti kepimpinan baginda seharusnya diadaptasi dalam perniagaan. Perniagaan yang berlandaskan ajaran Islam merupakan ibadah kepada Allah S.W.T untuk mendapatkan keberkatan dan kejayaan dunia dan akhirat (*al-falah*). Selain itu, ia juga relevan untuk diperaktikkan dalam seluruh aspek kehidupan manusia.

